



A Udin fisics e astrofisics di dut il mont

L'Ateneu al darà acet ae
Scuele Internazionâl di
Fisiche des particulis,
Astrofisiche e Cosmologjie.
Un projet finanziât de
Union europeane

La Universitât di Udin e
deventarà sede de Scuele
Internazionâl in Fisiche des
particulis, Astrofisiche e
Cosmologjie (International
School on Particle Physics,
Astrophysics and Cosmology)
che e darà adun l'an prossim
inte capitâl furlane tancj fra i
ricercjadôrs plui famôs dal mont
intai setôrs de astrofisiche e de
fisiche des altis energjiis. Il
travuart impuartant al è stât
rivât intal ambit des ativitâts de
rêt europeane di dottorâts
internazionâi di ricercje in
Fisiche des particulis,
Astrofisiche e Cosmologjie
(www.idpasc.lip.pt), che di chê
a fasin part, tra chei altris, il
dotorât di ricercje in Matemati-
che e Fisiche dal Ateneu e il
Cern di Gjinevre.

La Union Europeane, dentri dai
Erasmus Intensive Programmes,
e à finanziât di fat pal an
academic 2011-12, cun
pussibilitât di rinovament
trienâl, il projet european
coordenât di Barbara De Lotto,
ricercjadore dal Dipartiment di
chimiche, fisiche e ambient dal
Ateneu furlan e docent dal cors
di studis in Ingegnerie
elettroniche e dal dotorât in
Matematiche e Fisiche. «La
scuele - e sclaris De Lotto - e
da adun an par an students e
docents de International
doctorate network in particle
physics, astrophysics and
cosmology, il prin dotorât
internazionâl e interdissiplinâr
che al met adun i setôrs de
fisiche particellare ai
aceleradôrs, de astrofisiche e de
cosmologjie».

Tra i obietifs de rêt Idpasc al
jentre «la promozion di ativitâts
zontadis che a favorissin la
mobilitât dai students,
oportunitât di inseriment intal
circuit di ricercje internazionâl e
impuartants moments di scambi
scientific». Partner dal projet, di
là de Universitât di Udin, a son
il Politecnic di Lisbona, la
Universitât di sant Jacum di
Galizie, la Universitât Denis
Diderot di Paris, la Universitât di
Gjenua e la Universitât di
Padue.